



## Publicaziuns dalla vischnaunca, jamna 51

### Administraziun communal

Sur las fiastas da Nadal e Daniev ei l'administraziun communal **serrada** ils suandonts dis:

**venderdis, ils 23 da december 2011**  
**gliendisdis, ils 26 da december 2011, Sogn Stiafen**  
**gliendisdis, ils 2 da schaner 2012**

Nus giavischein ina biala fiasta da Nadal ed in bien onn 2012!

*Administraziun communal Disentis/Mustér*

---

### Bien di, bien onn

Tut en tut savein nus esser cuntents cun igl onn, che va prest da rendiu. Malgrad las turbulenzas monetaras e las pitgiras economicas eis ei iu d.tg bein cun nus. Communablamein havein nus danovamein instradau entginas ovras da valor cuzzonta sco p. ex. l'engrondaziun dalla Casa da tgira Sursassiala, l'Ovra Russein e la renovaziun dil Center da sport e cultura. Quei success ei mo pusseivels grazia al bien agid da vischins e vischinas e da premurai collaboraturs e collaboraturas.

Per quei sustegn admettel jeu ad in e scadin in profund Dieus paghi!

Jeu giavischel a convischinas e convischins bialas e graziusas fiastas da Nadal e Daniev ed in legriovel e benediu 2011.

Cun cordials salids ed auguris

en num dalla suprastonza communal  
*Dumeni Columberg, president communal*

---

### Cussegl da vischnaunca **Resoluziun en favur dil hotel «Disentiserhof»**

En sia seduta dils 16 da december 2011 ha il cussegl da vischnaunca approbau unanimamein ina revisiun parziala dalla planisaziun locala, necessaria per realisar l'Ovra Russein. Las autoritads communalas speran che la Regenza concedi proximamein la concessiun, sinaquei che quella impurtonta ovra sappi vegnir realisada ton pli spert.

El medem mument ha el deliberau en ina emprema lecziun ulteriuras midadas dalla planisaziun locala. D'ina vart setracta ei da correcturas pretendidas dalla Regenza e da l'autra vart d'arrundaziuns da suloms e da pintgas modificaziuns. Ella consultaziun publica ha era quella revisiun cattaun ina buna accoglientscha.

Alla fin dalla tschentada vegn Rita Huonder-Tenner reeligida honorificamein sco presidenta dil cussegl da vischnaunca per igl onn 2012 e Flavio Murer confirmaus sco vicepresidente.

La suprastonza communal leva rinforzar il coc dil vitg cun crear la basa legala per realisar in center ed in parc. Deplorablamein sa quei vegl desideri buca vegnir realisau, damai ch'ils proprietaris demuossan negina capientscha.

In ulteriur punct ei la zona speciala Disentiserhof. La midada duei promover ina reactivaziun da quei complex sut la cundiziun ch'il nez vegni impundius per segirar in ver menaschi da hotel. Leutier pretenda ei obligontamein ina planisaziun d'areal ed ina reglamentaziun per las habitaziuns secundaras sco era il consentiment dalla Regenza. Per saver baghegiar ella nova zona per indigens a Caschuarz (parcella 546), drova ei ina reglamentaziun pertucont habitaziuns primaras e secundaras. Damai ch'igl ei ina materia fetg complexa, pretenda ei ina minuziusa examinaziun.



Per quei vegn quella tematica aunc repassada en ina secunda lecziun, ch'ha liug ils **18 da schaner 2012**.

Danovamein ei il parlament communal s'occupaus cun las pitgiras dil hotel .Disentiserhof. Sco il president communal Dumeni Columberg informescha, fa la suprastonza tut il pusseivel per reactivar quei impurtont potenzial turistic. Cun rodund 600 letgs ei il hotel d'appartaments d'eminenta muntada per nossa destinaziun turistica. Els megliers onns ha el registrau bunamein 70 000 pernottaziuns, il davos onns varga 20 000. Quei sistem da hotel ei buca secumprovaus. Deplorablamein ein ils proprietaris d'appartaments buca pli obligai d'affittar lur habitaziuns, aschia ch'ins ei depedents da lur bunaveglia. Els ein buca fetg cooperativs. A vosta da quella problematica, dalla situaziun monetara e dallas grondas investiziuns necessarias, ei ina grupp d'investurs, cun la quala ins ha contrahau duront plirs meins, seretratga avon cuort.

Grazia a bunas relaziuns persunalas eis ei reussiu d'anflar ina nova grupp. Las contractivas cun quella ein bein avanzadas ed ins spera cun ina decisiun el proxim temps. En discussiun stat vinavon in'avertura provisoria dil hotel, quei denton mo en ina moda reducida (hotel da garni). Era quella da-monda **vegn decidida els proxims dis**.

Cun ina resoluziun conferma il cussegl da vischnaunca la gronda muntada economica dil hotel Disentiserhof. El sustegn fermamein las stentas da spindrar quei impurtont potenzial turistic ed incarichescha la suprastonza communal da cuntinuar cun las contractivas per anflar ina sligaziun cun in prospereivel avegnir.

*Suprastonza communal*

---

### **Reducziun individuala dallas premias dalla cassa da malsauns 2011**

Persunas e famiglias che vivan en relaziuns economicas mudestas, san risguardond certas premias, dumandar contribuziuns vid las premias dall'assicuranza da basa obligatoria per la tgira da malsauns (LAM).

Persunas che han aunc buca fatg diever dil dretg san far quei entochen la fin digl onn 2011 (**davos termin, datum dil bul da posta 31.12.2011**).

Informaziuns, basa legala, muossavia ed il formular d'annunzia anfleis Vus sin la pagina d'internet [www.sva.gr.ch](http://www.sva.gr.ch)). Vus saveis era retrer ils formulars tier l'administraziun communal.

Per damondas stein nus bugen a Vossa disposiziun

*Administraziun communal Disentis/Mustér*

---

### **Cantar dils retgs 2012**

Ils sogns Retgs dalla 5avla e 6avla classa da Mustér semettan era uonn sin via per visitar ils habitonts da Mustér. Els speran d'astgar legrar biars cun lur viseta e cant.

**Els fan il suandont tur:**

**Gievgia, ils 5-1-2012**

Casa s. Gions, Mompé Tujetsch, Cuoz, Caschuarz, Acletta, Sax, Davos-Mustér

**Venderdis, ils 6-1-2012**

Funs, Cuppa, Latis, Dulezi, Cons, Vitg, Scaletta, Carcarola, Raveras, Gonda, s. Gions

**Sonda, ils 7-1-2012**

Mompé Medel, Clavaniev, Cavardiras, Pardomat, Madernal, Disla, Faltscharidas, Sontget, Chischliun ed ustrias



**Dumengia, ils 8-1-2012**

Duront messa a Segnas, Segnas, Buretsch, Peisel, duront devoziun en baselgia s. Gions, duront messa en claustra

---

**Concert festiv cun igl orchester Südböhmische Kammerphilharmonie Budweis**

**Mardis, ils 27 da december 2011** allas 20.00 ella sala  
Peter Kaiser dalla claustra da Mustér.

Christina Daletka (sopran), Josias Just e Martin Zimmermann (clarinetta), Simon Camartin (dirigent).

---

**Mummas cun affons pigns Mustér**  
***Mirar il calender d'advent***

**Tgi:** geniturs cun affons pigns

**Cu:** 29 da december 2011

**Uras:** 17.00

**Sentupada:** avon il center Sursilvan d'agricultura

Suenter la spassegiada vegn purschiu zatgei dil center Sursilvan d'agricultura.

---

**Ludoteca Mustér**

**Liug/Ort:** Halla Cons, tel. 076 494 39 92

**e-mail:** ludoteca@disentis.ch

**Uras d'avertura/Öffnungszeiten:**

Gliendisdis/Montag: 18.30–20.00

Gievgia/Donnerstag: 16.00–17.30

Venderdis/Freitag: 18.30–20.00

---

**Biblioteca populara Mustér**

**Liug:** Casa da scola, tel. 081 947 52 90, biblioteca@disentis.ch

Sut [www.disentis.ch](http://www.disentis.ch) ni [www.bibliotecas-surselva.ch](http://www.bibliotecas-surselva.ch) anfleis Vus nies entir catalog bibliotecar.

Per e-mail saveis Vus reservar ina ni pliras medias ed enteifer 5 dis retrer ad emprest ellas en biblioteca populara.

**La biblioteca ei aviarta:**

Gliendisdis 18.30–20.00 uras

Mardis 13.30–15.00 uras

Gievgia 16.00–17.30 uras

Venderdis 18.30–20.00 uras

Nies motto: Leger . . . tedlar . . . mirar . . . !  
Nus selegrein da mintga viseta.

*Biblioteca populara Mustér*